

全上古三代秦漢三國六朝文

全齊文卷十

烏程嚴可均校輯

王儉二

國史條例議

金粟之重八政所先食貨通則國富民實宜加編錄以崇務本朝會志前史不書蔡邕稱先師胡廣說漢舊儀此乃伯喈一家之意曲碎小儀無煩錄宜立食貨省朝會洪範九疇一曰五行五行之本先乎水火之精是爲日月五行之宗也今宜憲章前軌無所改革又立帝女傳亦非淺識所安若有高德異行自當載在列女若止於常美則仍舊不書

南齊書禮超傳左僕射王儉議

乘輿副車議

時乘輿無副昔周五輅大朝臨軒權列三輅今衣書十二乘古制車之象也亦曰五時副車青萌車是謂掄輿車

通典六十四

服章議

依漢三公服山龍九章卿華蟲七章

南齊書輿服志

金貂議

漢景六年梁王入朝中郎謁者金貂出入殿門左思魏都賦云藹藹侍列金貂齊光此藩國侍臣有貂之明文晉百官表云太尉參軍四人朝服武冠此又宰府之明文

南史二十  
二王儉傳

公府長史朝服議

春秋國語云貌者情之華服者心之文嚴鄭盛禮衣冠爲大是故軍國異容內外殊序而自頃承用每有乖違府職掌人教四方是則臣居毗佐志在當官永言先典載懷夕惕案晉令公府長史官品第六銅印墨綬朝服進賢兩梁冠掾屬官品第七朝服進賢一梁冠晉官表注亦與令同而今長史掾屬但著朱服而已此則公違明文積習成謬謂宜依舊制長史兩梁冠掾屬一梁冠並同備

朝服中單韋舄率由舊章若所上蒙允並請班司徒二府及諸僚  
同三府通爲永準又尋舊事司徒公府領步兵者職僚悉同降朝  
不領兵者主簿祭酒中單韋舄並備令史以下唯著玄衣今府既  
開公謹遵此制其或有署臺位者玄服爲疑案今稱諸有兼官皆  
從重官之例尋內官爲重其署臺位者悉宜著位之服不在玄服  
之例若署諸卿寺位兼府職者雖三品而卿寺爲卑則宜依公府  
玄衣之制服章事重禮儀所先請臺詳服

宋書禮志五元徽四年司徒右長史王儉議

又議

自頃服章多闕有違前準近議依令文被報不宜改革又稱左丞  
劉議案令文凡有朝服今多闕亡然則文存服損非唯鉉佐用捨  
既久卽爲舊章如下旨伏尋皇宋受終每因晉舊制律令條章同  
規在昔若事有宜必合懲改則當上關詔書下由朝議懸諸日月  
垂則後昆豈得因外府之乖謬以爲盛宋之興典用晉氏之律令

而謂其儀爲類法哉。順違從失，非所望於高議。申明舊典，何改革之可論。又左丞引令史之闕服，以爲鉉佐之明比。夫名位不同，禮數異等。令史從省，或有權宜。達官簡略，爲失彌重。又主簿祭酒，備服於王庭。長史掾屬，朱衣以就列。於是倫比自成矛盾。此而可忍，孰不可安。將引令以尊舊，臺據失以爲例。研詳符旨，良所未譬。當官而行，何彊之有。制令昭然，守以無貳。同上

郊殷議

案禮記王制：天子先祫後時祭，諸侯先時祭後祫。春秋魯僖二年祫，明年春禘。自此以後，五年再殷。禮緯稽命徵曰：三年一祫，五年一禘。經記所論禘祫與時祭，其言詳矣。初不以先殷後郊爲嫌。至於郊配之重，事由王迹。是故杜林議云：漢業特起，不因緣堯，宜以高帝配天。魏高堂隆議以舜配天。蔣濟云：漢時奏議謂堯已禪舜，不得爲漢祖。舜亦已禪禹，不得爲魏之祖。今宜以武皇帝配天。晉

宋因循卽爲前式。又案禮及孝經援神契並云：明堂有五室。天子每月於其室聽朔布教祭五帝之神。配以有功德之君。大戴禮記曰：明堂者，所以明諸侯尊卑也。許慎五經異義曰：布政之宮，故稱明堂。明堂盛貌也。周官匠人職稱明堂有五室。鄭玄云：周人明堂五室，帝一室也。初不聞有文王之寢。鄭志趙商問云：說者謂天子廟制如明堂，是爲明堂。卽文廟邪？鄭荅曰：明堂主祭上帝，以文王配耳。猶如郊天，以后稷配也。袁孝尼云：明堂法天之宮，本祭天帝，而以文王配。配其父於天位，則可。牽天帝而就人鬼，則非義也。秦元十三年，孫卿之議稱郊以祀天，故配之以后稷。明堂以祀帝，故配之以文王。由斯言之，郊爲皇天之位，明堂卽上帝之廟。徐邈謂配之爲言，必有神主。郊爲天壇，則堂非文廟。史記云：趙絳王臧欲立明堂，于時亦未有郊配。漢又祀汾陰五時，卽是五帝之祭，亦未有郊配。議者或謂南郊之日，已旅上帝。若又以無配而特祀明堂，

則一日再祭於義爲黷。案古者郊本不共日。蔡邕獨斷曰祠南郊祀畢次北郊。又次明堂高廟。世祖廟謂之五供。馬融云郊天之祀咸以夏正。五氣用事有休有王。各以其時。兆於方郊。四時合歲功作相成。亦以此月總旅明堂。是則南郊明堂各日之證也。近代從省。故與郊同日。猶無煩黷之疑。何者其爲祭雖同。所以致祭則異。孔晁云言五帝佐天化育。故有從祀之禮。旅上帝是也。至於四郊明堂則是本祀之所。譬猶功臣從饗。豈復廢其私廟。且明堂有配之時。南郊亦旅上帝。此則不疑於共日。今何故致嫌於同辰。又禮記天子祭天地四方山川五祀歲徧。尙書堯典咸秩無文。詩云昭事上帝。聿懷多福。據此諸義。則四方山川猶必享祀。五帝大神義不可略。魏文帝黃初二年正月郊天地明堂。明帝太和元年正月以武皇帝配天。文皇帝配上帝。然則黃初中南郊明堂皆無配也。又郊日及牲色異議紛然。郊特牲云郊之用辛。周之始郊也。盧植

云辛之爲言自新絜也。鄭玄云用辛日者爲人當齋戒自新絜也。漢魏以來或丁或巳而用辛常多攷之典據辛日爲九郊特牲又云郊牲幣宜以正色繆襲據祭法云天地辟憤周家所尙魏以建丑爲正牲宜尙白白虎通曰三王祭天一用夏正所以然者夏正得天之數也魏用異朔故牲色不同今大齊受命建寅創厯郊廟用牲一依晉宋謂宜以今年十月殷祀宗廟自此以後五年再殷來牟正月上辛有事南郊宜以共日還祭明堂又用次辛饗祀北郊而並無配犧牲之色率由舊章

南齊書禮志上  
建元元年七月

### 朝堂諱訓議

后諱依舊不立訓禮天子諸侯諱羣祖臣隸既有從敬之義宜爲太常府君諱至於朝堂榜題本施至極既追尊所不及禮降於在三晉之京兆宋之東安不列榜題孫毓議稱京兆列在正廟臣下應諱而不上榜宋初博士司馬道敬議東安府君諱宜上榜何承



天執不同，卽爲明據。其有人名地名犯太常府君及帝后諱者，皆改宣帝諱同二名，不偏諱。所以改承明門爲北掖，以補有之字與承，並東宮承華門，亦改爲宣華云。南齊書禮志上建元元年太常上朝堂諱訓僕射王儉議

太子迎車駕臨喪議

尋禮記服問君所主夫人妻太子嫡婦言國君爲此三人爲主喪也。今鸞輿臨降，自以主喪而至，雖因事撫慰義不在弔。南郡以下不應出門奉迎，但尊極所臨，禮有變革，權去杖紼，移立戶外，足表情敬，無煩主哭。皇太子旣一宮之重，自應以車駕幸宮，依常奉候。旣當成服之日，吉凶不容相干，宜以衰幘行事，望拜止哭，率由舊章，尊駕不以臨弔，奉迎則惟常體求之情禮，如爲可安。南齊書文惠太子傳

穆妃薨成服日車駕出臨喪朝議疑太子應出門迎左僕射王儉云云又南史四十四

國臣爲太子妃服議

禮庶人爲國君齊衰先儒云庶人在官若府史之屬是也。又諸侯

之大夫妻爲夫人服總衰七月。以此輕微疏遠故不得盡禮。今皇孫自是蕃國之王公。太子穆妃是天朝之嫡婦。宮臣得申小君之禮。國官豈敢爲夫人之敬。當單衣白帕。素帶哭於中門外。每臨輓入。與宮官同。南齊書禮志下建元二年太子穆妃薨南郡王開喜公國臣疑制君母服儉又議

宮臣爲太子妃服議

禮記文王世子父在斯爲子。君在斯爲臣。且漢魏以來。宮僚充備。

臣隸之節。具體在三。昔庾翼妻喪。王允勝弘

南史作舍

謂府吏宜有小

君之服。況臣節之重邪。宜依禮爲舊君妻齊衰三月。居官之身。並合屬假朝。晡臨哭。悉繫東宮。今臣之未從官在遠者。於居官之所

屬。寧二日半。仍行喪成服。遺牋表不得奔赴。

南齊書禮志下建元二年皇太子妃薨前

宮臣疑所服左僕射王儉議又略見南史二十二

太子妃銘旌議

禮旣塗棺。祇取銘置于殯東。大斂畢。便應建于西階之東。

南齊書禮志下

太子妃斬草乘黃議  
建銘旌僕射王儉議

太子妃薨建旌議

旌本是命服無關於凶事今公卿以下平存不能備禮故在凶乃建耳東宮秩同上公九命之儀妃與儲君一體義不容異無緣未同常例別立凶旌大明舊事是不經詳議率爾便行耳今宜攷以禮典不得效尤從失吉部伍自有析輅凶部別有銘旌若復立旌復置何處妻自用八南齊書禮志下宋大明二年太子妃薨建旌及畫龍升降云何又用幾妻僕射王儉議又見通典八十四太子妃靈還在道不設祭議

既虞卒哭祭之於廟本是祭序昭穆耳未全同卒吉四時之祭也所已有朔望殷事蕃國不行權制宋江夏王如卒哭已後朔望設祭帝室既以卒哭除喪無緣方有朔望之祭靈筵雖未升廟堂而廟中即成行廟猶如桓立及宋高祖長沙臨川二國並有移廟之

禮豈復謂靈筵在途便設殷事耶推此而言朔望不復俟祭宋懿  
后時舊事不及此益可知時議南齊書禮志下有司奏穆姬卒哭後靈還在道遇朔望當須設祭不

王儉

### 太子妃喪遇閏議

三百六旬尚書明義文公納幣春秋致譏穀梁云積分而成月公  
羊云天無是月雖然左氏謂告朔爲得禮是故先儒咸謂三年其  
喪歲數沒閏大功以下月數數閏夫閏者蓋是年之餘日而月之  
異朔所以吳商云合閏以正基允協情理今杖基之喪雖以十一  
月而小祥至於祥縞必須周歲凡厭屈之禮要取象正服祥縞相  
去二月厭降小祥亦以則之又且求之名義則小祥本以年限攷  
於倫例則相去必應二朔今以厭屈而先祥不得謂此事之非基  
事既同條情無異貫沒閏之理固在言先設令祥在此晦則去縞  
三月依附準例益復爲礙謂應須五月晦乃祥此國之大典宜共

精詳並通關八座丞郎研盡同異

南齊書禮志下建元三年左僕射王儉議又見通典一百

荅褚淵難喪遇閏議

含閏之義通儒所難但祥本應基屈而不遂語事則名體俱存論哀則情無以異述雖數月義實計年閏是年之歸餘故宜總而基之基而兩祥緣尊故屈祥則沒閏象年所申屈申兼著二途具舉經紀之旨其在茲乎如使五月小祥六月乃閏則祥之去編事成二月是爲十一月以象前基二朔以放後歲名有區域不得相參魯襄二十八年十二月乙未楚子卒唯書上月初不言閏此又附正之明義也鄭射王賀唯云基則沒閏初不復區別杖基之中祥將謂不俟言矣成休甫云大祥後禫有閏別數之明杖基之祥不得方於綬綯之末卽恩如彼就例如此

南齊書禮志下建元三年又見通典一百

穆太妃小祥南郡王應不相待議

禮有倫序義無徒設如令遠則不待近必相須禮例旣乖卽心無

取若疑兄弟同居吉凶舛雜則遠還之子自應開立別門以終喪事靈筵祭奠隨在家之人再替而毀庶子在家亦不待嫡而況諸妃正體王室中軍長舅之重天朝又行權制進退彌復非疑謂應不相待中軍縵縞之日聞喜致哀而已不受弔慰至聞喜變除昆弟亦宜相就寫情不對客南史四十四竟陵王子良傳太妃以七郡王應相待尚書左僕射王儉議

安陸王子婦爲范貴妃服議

孫爲慈孫婦爲慈婦姑爲慈姑宜制莽年服南史四十四安陸王子敬傳子敬所生早亡帝命貴妃范氏母養之而子及婦服制禮無明文永明中尚書令王儉議

單拜錄尚書優策議

見居本官別拜錄推理應有策書而舊事不載中朝以來三公王侯則優策並設官品第二策而不優優者褒美策者兼明委寄尚書職居天官政化之本故尚書令品雖第三拜必有策錄尚書品

秩不見而總任彌重前代多與本官同拜故不別有策卽事緣情不容均之凡僚宜有策書用申隆寄既異王族不假優文南齊書褚淵傳司空未拜而薨掾屬爲吏散議

依禮婦在塗聞夫家喪改服而入今掾屬雖未服勤而吏節稟於

天朝宜申禮敬南齊書褚淵傳

司空解職而薨府史制服議

依中朝士孫德祖從樂陵遷爲陳留未入境樂陵郡吏依見君之服陳留迎吏依娶女有吉日齊襄弔司徒府宜依居官制服南齊書褚淵傳

淵傳

庶姓三公輜車議

官品第一皆加幢絡南齊書褚淵傳

昭皇后遷祔儀議

奠如大敘賀循云從墓之墓皆設奠如將葬廟朝之禮范甯云將

窆而奠雖不稱爲祖而不得無祭南齊書禮志下建元四年高帝山陵昭皇后應遷祔祠部疑有祔祭及遣散諸奠九飯之儀不在僕射王儉議

遷祔設虞議

范甯云葬必有魂車若不爲其歸祔將安舍世中改葬卽墓所施靈設祭何得不祭而毀邪賀循云既窆設奠於墓以終其事雖非正虞亦粗相似晉氏修復五陵宋朝敬后改葬皆有虞今設虞非疑南齊書禮志下建元四年昭皇后遷祔自同奏應無虞左僕射王儉議

諒闇議

權典旣行喪禮斯奪事興漢世而源由甚遠殷宗諒闇非有服之稱周王卽吉唯宴樂爲議春秋之義嗣君踰年卽位則預朝會聘享焉左氏云凡君卽位卿出並聘踐修舊好又云諸侯卽位小國聘焉以繼好結信謀事補闕禮之大者至於諒闇之內而圖婚三年未終而吉祔齊歸之喪不廢蒐杞公之卒不徹樂皆致譏貶以



明鑒戒自斯而談朝聘蒸嘗之典卒哭而備行婚禘蒐樂之事三載而後舉通塞興廢各有由然又案大戴禮記及孔子家語並稱武王崩成王嗣位明年六月既葬周公冠成王而朝於祖以見諸侯命祝雍作頌襄十五年十一月晉侯周卒十六年正月葬晉悼公平公既卽位改服修宮烝于曲沃禮記曾子問孔子曰天子崩國君薨則祔取羣廟之主而藏諸祖廟禮乎卒哭成事而後主各反其廟春秋左氏傳凡君卒哭而祔祔而特祀於主蒸嘗禘於廟先儒云特祀於主者特以喪禮奉新亡者至於寢不同於古蒸嘗禘於廟者卒哭成事羣廟之主各反其廟則四時之祭皆卽吉也三年喪畢吉禘於廟躋羣主以定新主也凡此諸義皆著在經詁昭乎方冊所以晉宋因循同規前典卒哭公除親奉蒸嘗率禮無違固心允協爰至秦豫元年禮官立議不宜親奉乃引三年之制自天子達又據王制稱喪三年不祭唯祭天地社稷越絀而行事

曾不知自天子達本在至情既葬釋除事以僭奪委衰篋衾孝享  
宜申越紼之旨事施未葬卒哭之後何紼可越復依范宣之雖杜  
預譙周之論士祭並非明據晉武在喪每欲存寧戚之懷不全依  
諒闇之典至於四時蒸嘗蓋以哀疾未堪非便頓改舊式江左以  
來通儒傾學所歷多矣守而弗革義豈徒然又宜卽心而言公卿  
大夫則負扈親臨三元告始則朝會萬國雖金石輟響而簋簠充  
庭情深於恆哀而跡降於凡制豈曰能安國家故也宗廟蒸嘗孝  
敬所先寧容吉事備行斯典獨廢就令必宜廢祭則應三年永闕  
乃復同之他故有司攝禮進退二三彌乖典衷謂宜依舊親奉  
書禮志上建元四年尚書令王儉採晉  
中朝諒闇議奏從之又見通典五十二

嗣位郊祀議

案秦爲諸侯雜祀諸時始皇并天下未有定祖漢高受命因雍四  
時而起北時始祀五帝未定郊丘文帝六年新垣平議初起渭陽

五帝廟武帝初至雍郊見五時後常三歲一郊祠雍元鼎四年始  
立后土祠於汾陰明年立太一祠於甘泉自是以後二歲一郊與  
雍更祠成帝初卽位丞相匡衡於長安定南北郊哀平之際又復  
甘泉汾陰祠平帝元始五年王莽奏依匡衡議還復長安南北二  
郊光武建武二年定郊祀兆於洛陽魏晉因循率由漢典雖時或  
參差而類多閒歲至於嗣位之君參差不一宜有定制檢晉明帝  
太寧三年南郊其年九月崩成帝卽位明年改元卽郊簡文咸安  
二年南郊其年七月崩孝武卽位明年改元亦郊宋文帝元嘉三  
十年正月南郊其年二月崩孝武嗣位明年改元亦郊此則二代  
明例差可依放今聖明係業幽顯宅心言化則頻郊非嫌語事則  
元號初改醴燎登配孝敬兼遂謂明年正月宜饗禮二郊虞祭明  
堂自茲厥後依舊閒歲南齊書禮志上建元四年世祖卽位尙書  
令王儉議又略見南史二十二通典四十二

日蝕廢社議

禮記曾子問天子嘗禘郊社五祀之祭簠簋既陳唯大喪乃廢至於當祭之日火及日蝕則停尋伐鼓用牲由來尚矣而簠簋初陳問所不及據此而言致齋初日仍值薄蝕則不應廢祭又初平四年博士孫瑞議以日蝕廢冠而不廢郊朝議從之王者父天親地郊社不殊此則前準謂不宜廢

南齊書禮志上永明元年十二月有司奏今月三日臘祠太社櫻一

日合朔日蝕既在致齋內未審於社祠無疑不曹檢未有前準尚書令王儉議又見通典七十八

賜進士出身二品銜廣東等處提刑按察使司按察使兼管驛傳事務高王毓藻校刊

全齊文卷十一

烏程嚴可均校輯

王儉三

南郊明堂異日議

前漢各日，後漢亦不共辰。魏晉故事，不辨異同。宋立明堂，唯據自郊祖宮之義，未達祀天旅帝之旨。何者？郊壇旅天，甫自詰朝還祀明堂，便在日昃。雖致祭有由，而煩黷斯甚。異日之議，於理爲弘。春秋感精符云：王者父天母地，則北郊之祀，應在明堂之先。漢魏北郊亦皆親奉。晉泰寧有詔，未及遵建。咸和八年，甫得營繕太常，顧和秉議，親奉康皇之世，已經遵用。宋氏因循，未遑釐革。今宜親祠北郊。明年正月上辛祠昊天，次辛瘞后土，後辛祀明堂，御並親奉車服之儀，率遵漢制。南郊大駕，北郊明堂，降爲法駕，袞冕之服，諸祠咸用。

南齊書禮志上永明二年尚書令王儉議

釋奠釋菜議

周禮春入學舍菜合舞記云始教皮弁祭菜示敬道也又云始入學必釋奠先聖先師中朝以來釋菜禮廢今之所行釋奠而已金石俎豆皆無明文方之七廟則輕比之五祀則重陸納車肩謂宣尼廟宜依亭侯之爵范甯欲依周公之廟用王者儀范宣謂當其爲師則不臣之釋奠日宜備帝王禮樂此則車陸失於過輕二范又傷於太重喻希云若至王者自設禮樂則肆賞於至敬之所若欲嘉美先師則所通典作況非備尋其通典作此說守附情理皇朝屈尊弘教待以師資引同上公卽事惟允元嘉立學裴松之議應儻六佾以郊樂未具故權奏登歌今金石已備宜設軒縣之樂六佾之舞牲牢器用悉依上公南齊書禮志上永明三年尚書合王儉議又見通典五十三

皇孫南郡王冠議

皇孫冠事歷代所無禮雖有嫡子無嫡孫然而地居正體下及五

世今南郡王體自儲暉實惟國裔元服之典宜異列蕃案土冠禮主人立冠朝服賓加其冠贊者結纓鄭玄云主人冠者之父兄也尋其言及父兄則明祖在父不爲主也大戴禮記公冠篇云公冠自爲主四加立冕以卿爲賓此則繼體之君及帝之庶子不得稱子者也小戴禮記冠義云冠於阼以著代也醮於客位三加彌尊加有成也注稱嫡子冠於阼庶子冠於房記又云古者重冠故行之於廟所以自卑而尊先祖也據此而言彌與鄭注儀禮相會是故中朝以來太子冠則皇帝臨軒司徒加冠光祿贊冠諸王則郎中加冠中尉贊冠今同於儲皇則重依於諸王則輕又春秋之義不以父命辭王父命禮父在斯爲子君在斯爲臣皇太子居臣子之節無專用之道南郡雖處蕃國非支庶之列宜禀天朝之命微申冠阼之禮晉武帝詔稱漢魏遣使冠諸王非古正典此蓋謂庶子封王合依公冠自主之義至於國之長孫遣使惟允宜使太常



持節加冠大鴻臚爲贊醕酒之儀亦歸二卿祝醕之餘附准經記別更撰立不依蕃國常體國官陪位拜賀自依舊章其日内外二品清官以上詣止車集賀並詣東宮南門通牋別日上禮宮臣亦詣門稱賀如上臺之儀既冠之後剋日謁廟以弘尊祖之義此既大典宜通關八座丞郎並下二學詳議南齊書禮志上永明五年儀注未育前準尚書令王儉議又見通典五十六江徵不宜繼孫啟

禮無後小宗之文近世緣情皆由父祖之命未有既孤之後出繼宗族也雖復臣子一揆而義非天屬江忠簡府嗣所寄唯徵一人仍無眷屬徵宜還本若不欲江孫絕後可以徵小兒繼孫爲孫南齊書江徵傳初宋明帝敕徵出繼從叔孫爲從祖弟後於是僕射王儉啟

諫省南豫州啟

愚意政以江西連接汝潁土曠民希匈奴越逸唯以壽春爲阻若

使州任得才，虜動要有聲聞，豫設防禦，此則不俟南豫假令，或慮一失，醜揭之來，聲不先聞，胡馬倏至，壽陽嬰城固守，不能斷其路，朝廷遣軍，歷陽已當，不得先機，戎車初戒，每事草創，孰與方鎮常居軍府，素正臨時配助，所益實少，安不忘危，古之善政，所以江左屈分南豫，意亦可求，如聞西豫力役尚復粗可，今得南譙等郡民戶益薄於其實，益復何足云。

南齊書州郡志上建元二年

立春在郊，無煩遷日，啟

案禮記郊特牲云：郊之祭也，迎長日之至也。大報天而主日也。易說三王之郊，一用夏正。盧植云：夏正在冬至後。傳曰：啟蟄而郊，此之謂也。然則圓丘與郊各自行，不相害也。鄭玄云：建寅之月，晝夜分而日長矣。王肅曰：周以冬祭天，於圓丘以正月，又祭天以祈穀。祭法稱燔柴太壇，則圓丘也。春秋傳云：啟蟄而郊，則祈穀也。謹尋禮傳二文，各有其義。盧王兩說有若合符。中朝省二丘以并二郊。

卽今之郊禮義在報天事兼祈穀既不全以祈農何必俟夫啟塾  
史官惟見傳義未達禮旨又尋景平元年正月三日辛丑南郊其  
月十一日立春元嘉十六年正月六日辛未南郊其月八日立春  
此復是近世明例不以先郊後春爲嫌若或以元日合朔爲礙者  
則晉成帝咸康元年正月一日加元服二日親祠南郊元服之重  
百僚備列雖在致齋行之不疑今齋內合朔此卽前準若聖心過  
恭寧在嚴絜合朔之日散官備防非預齋之限者於止車門外別  
立幔省若日色有異則列於省前望實爲允竊謂無煩遷日南齊書禮志上永明元年當南郊而立春在郊後世祖欲遷郊尙書令王儉敗又略見通典四十二

與豫章王疑牋

舊楚蕭條仍歲多故荒民散亡

南史作政荒人散

實須緝理公臨蒞南

英風惟穆江漢來蘇八州慕義自庾亮以來荆楚無復如此美政  
古人期月有成而公旬日致治豈不休哉

南齊書豫章王疑傳建元元年遷揚州刺史

傳章郡王僕射王儉處又南史  
四十二以此書在齊未受禪時

答陸澄書

易體微遠實貫羣籍施孟異聞周韓殊旨豈可專據小王便爲該  
備依舊存鄭高同來說元凱注傳超邁前儒若不列學官其可廢  
矣賈氏注經世所罕習穀梁小書無俟兩注存糜略范率由舊式  
凡此諸義並同雅論疑孝經非鄭所注僕以此書明百行之首實  
人倫所先七略藝文並陳之六藝不與蒼頡凡將之流也鄭注虛  
實前代不嫌意謂可安仍舊立置

南齊書  
陸澄傳

答王遠之問

皇太子穆妃服尚書左丞兼著作郎王遠之問左僕射王儉中軍  
南郡王小祥應待聞喜不穆妃七月二十四日薨聞喜公八月發  
哀計十一月之限應在六月南郡王爲當同取六月則太祥復申  
一月應用八月非復正月在存親之義若各自爲祥廬至相聞玄

素雜糅未審當有此疑不儉曰送往有已復生有節罔極非服制所申祥緝明示終之斷相待之義經記無聞世人多以廬室衰麻不宜有異故相去一二月者或申以俱除此所謂任情徑行未達禮旨昔撰喪記已嘗言之遠還之人自有爲而未祭在家之子立何辭以不變禮有除喪而歸者此則經記之遺文不待之明據假使應待則相去彌年亦宜必待乃爲衰經永服以窮生吉蠲長絕於宗廟斯不可矣苟曰非宜則旬月之間亦不容申何者禮有倫序義無徒設今遠則不待近必相須禮例既乖卽心無取若疑兄弟同居吉凶舛雜則古有異宮之義設無異宮則遠還之子自應開立別門以終喪事靈筵祭奠隨在家之人再葦而毀所以然者奔喪禮云爲位不奠鄭玄云以其精神不存乎此也聞哀不時實緣在遠爲位不奠益有可安此自有爲而然不關嫡庶庶子在家亦不待嫡矣而況儲妃正體王室中軍長嫡之重天朝又行機制

進退彌復非疑謂不應相待中軍祥縞之日聞喜致哀而已不受  
弔慰及至忌辰變除昆弟亦宜相就寫情而不對客此國之大典  
宜通關八座丞郎共盡同異然後奏御南齊書禮志下

竟陵王山居贊

升堂踐室金暉玉朗疊疊大韶遙遙開賞道日德弘聲由業廣  
重寶歸情深虛往濠梁在茲安事遐想藝文類聚二十六

暢連珠

蓋聞王佐之才雖遠豈必見採於當世凌雲之氣徒盛無以自致  
於雲間是故魏人指王於外野和氏泣血於荆山藝文類聚五十七

高帝哀策文

降階執禮泣血纏心感容臺之罷御哀恭館之不臨仰神儀而邈  
絕視區物而懷陰俾茲良史敬修舊則敢圖鴻規式揚至德其辭  
曰

靈源遙裔肇惟商。聖功靈夏賢識歸周。我皇踵武超冠前猷。英  
風允迪德音孔修。月準敷仁日精表孝。則地均和體天合照。外弘  
三至內隆七教。水祗將傾乾維晦象。韋弁長襲鼓磬屬響。警化已  
淪政刑遂往。國圖靡緝民規載爽。康世以德撥亂資武。威以雷霆  
潤以風雨。六術允昭四義克舉。自東徂北遐方卽敘功被河濟。化  
隆江漢帝基仰式。王維佇幹改步藩屏。來登翼贊網繆總章。因循  
陽館昔在保衡。君違斯正爰茲博陸。亦鑒靈命放曷以忠。登明資  
敬義煥金石功昭舞詠。蠢爾荆漢悖亂人經謀連樞禁兵接神洞。  
禦姦以德禦兇以刪獻捷宗寢飲至王庭政教雲行徽猷天造。山  
鑑紫璇苑茂朱草玉檢騰暉金繩薦寶。天鏡既移地維既肅遐邇  
壹體表裏禔福乃眷斯民昧旦忬軸興文偃武繼禹舊服所尙惟  
簡所寶惟賢居尊彌約無善不延膠庠載緝風軌克宣上洞清儀  
下達玄泉聽覽開且應物餘景怡慮以文棲心以靜鴻章晨暎徽

言夕永迹庇區服情深箕頤萬寓飡和百神受職梁甫欣儀云亭  
望式輔德伊何奄捐民極嵩岳長傾宸暉斯長機照惟寂達鑒靡  
傷愼終敬始知微知彰立言垂範玉潤金相瞻仰遺式哀結流霜  
旋玉軼之暇鏡動雲旗之逶迤振哀節於八極習清蹕於咸池顧  
應掖而稍遠視機衡而長離風遲遲而懷暮日惜惜其若垂感衣  
冠於喬岳追弓劍之在斯悼丁年之薄祐訴窮心於兩儀

藝文類聚十四

### 皇太子妃哀策文

肇惟初識芳猷夙就翩翩禮園徘徊樂園視秋齊明方春等茂伊  
宋之季天衢荐阻咨我儲貳締縉江游衛女事齊樊姬贊楚美著  
嬪嗣徽音踵武數盈則反否極斯昌肅膺靈命經緯三光往儀衡  
館來式椒堂綢組咸事象服有章八演仰則六幽望景悠悠草昧  
如何不永方中委曜先秋落穎世有遺塵庭無餘影嗚呼哀哉遵  
三兆之嘉日追九筮之靈期澄金波而映鑾旆命飛廉而拂瓊輶



揚清節於漢表，動嘶挽於雲基。

藏文類聚十六

太宰褚彥回碑文

并序

夫太上有立德，其次有立功，此之謂不朽。所以子產云：亡宣尼泣其遺愛，隨武旣沒，趙文懷其餘風於文簡公見之矣。公諱淵，字彥回，河南陽翟人也。微子以至仁開基，宋段以功高命氏。爰逮兩漢，儒雅繼及。魏晉以降，奕世重暉。乃祖太傅元穆公，德合當時，行比州壤，深識臧否，不以毀譽形言。亮采王室，每懷沖虛之道，可謂婉而成章，志而晦者矣。自茲厥後，無替前規。建官惟賢，軒冕相襲。公稟川嶽之靈暉，含珪璋而挺曜，和順內凝，英華外發。神茂初學，業隆弱冠。是以仁經義緯，敦穆於閭庭；金聲玉振，寥亮於區寓。孝敬淳深，率由斯至。盡歡朝夕，人無閒言。逍遙乎文雅之圃，翱翔乎禮樂之場。風儀與秋月齊明，音徽與春雲等潤。韻宇弘深，喜愠莫見。其際心明通亮，用言必由於己。汪汪焉洋洋焉，可謂澄之不清，撓

之不測。袁陽源才氣高奇，綜覈精裁。宋文帝端明臨朝，鑒賞無味。袁既延譽於遐邇，文亦定婚於皇家。選尙餘姚公主，拜駙馬都尉。漢結叔高，晉姻武子，方斯蔑如也。釋褐著作佐郎，轉太子舍人。崔纓登朝，冠冕當世。升降兩宮，實惟時寶。具瞻之範，既著台衡之望。斯集出參太宰軍事，入爲太子洗馬。俄遷祕書丞，贊道槐庭。司文天閣，光昭諸侯。風流藉甚，以父憂去職。喪過乎哀，幾將毀滅。有識留感，行路傷情。服闋，除中書侍郎。王言如絲，其出如綸。恪居官次，智効惟穆。于時新安王寵冠列蕃，越數邦教，毗佐之選，妙盡國華。出爲司徒右長史，轉尙書吏部郎，執銓以平。御煩以簡，裴楷清通，王戎簡要，復存於茲。泰始之初，入爲侍中，曾不移朔。遷吏部尙書。是時天步初夷，王途尙阻，元戎啟行，衣冠未緝。內贊謀謨，外康流品。制勝既遠，涇渭斯明。賞不失勞，舉無失德。績簡帝心，聲敷物聽。事寧，領太子右衛率，固讓不拜。尋領驍騎將軍，以帷幄之功，膺唐

祇之秩封雩都縣開國伯食邑五百戶既秉辭梁之分又懷寢上之志所受田邑不盈百井久之重爲侍中領右衛將軍盡規獻替均山甫之庸緝熙王旅兼方叔之望丹陽京輔遠近攸則吳興襟帶實惟股肱頻作二守並加蟬冕政以禮成民是以息明皇不豫儲后幼沖貽厥之寄允屬時望徵爲吏部尙書領衛尉固讓不拜改授尙書右僕射端流平衡外寬內直弘二八之高慕宣由庚而垂詠太宗卽世遺命以公爲散騎常侍中書令護軍將軍送往事居忠貞允亮秉國之鈞四方是維百官象物而動軍政不戒而備公之登太階而尹天下君子以爲美談亦猶孟軻致欣於樂正羊職悅賞於士伯者也丁所生母憂謝職毀疾之重因心則至朝議以有爲爲之魯侯垂式存公忘私方進明準爰降詔書敦還攝任固請移歲表奏相望事不我與屈已弘化屬值三季在辰歐蕃內侮桂陽失國窺竊神器鼓棹則滄波振蕩建旗則日月蔽虧出江

派而風翔入京師而雷動鳴絃於宗稷流鋒鏃於象魏雖英宰  
臨戎元渠時殄而餘黨竄繁宮廟憂逼公乃總熊羆之士不貳心  
之臣戮力盡規克寧禍亂康國祚於綴旒拯王維於已墜誠山太  
祖之威風抑亦仁公之翼佐可謂德刑詳禮義信戰之器也以靖  
難之功進爵爲侯兼授尚書令中軍將軍給班劍二十人功成弗  
有固秉摛挹改授侍中中書監護軍如故又以居母艱去官雖事緣  
義感而情均天屬顏丁之合禮二連之善喪亦曷以踰天厭宋德  
水運告謝嗣王荒怠於天位強臣憑陵於荆楚廢昏繼統之功翕  
亂寧民之德公實仰贊宏規參聞神算雖無受脤出車之庸亦有  
甘寢秉羽之績乃作司空山川攸序兼授衛軍戎政輯睦旣而齊  
德龍興順皇高禪深達先天之運匡贊奉時之業彌諸允正徽猷  
弘遠樹之風聲著之語言亦猶稷契之臣虞夏荀裴之奉魏晉自  
非坦懷至公永鑒崇替孰能光輔五君寅亮二代者哉大啟南康

爰登中鉉時膺土宇固辭邦教今之尙書令古之冢宰雖秩輕於  
衮司而任隆於百辟暫遂沖旨改授朝端邇無異言遠無異望帝  
嘉茂庸重申前冊執五禮以正民簡八刑而罕用故能聘績康衢  
延慈哲后義在資敬情同布衣出陪鑾闕入奉帷殿仰南風之高  
詠餐東野之祕寶雅議於聽政之晨披文於宴私之夕參以酒德  
間以琴心賡有餘暉遙然畱想君垂冬日之溫臣盡秋霜之肅  
肅焉穆穆焉於是見君親之同致知在三之如一太祖升遐綢繆  
遺寄以侍中司徒錄尙書事票玉几之顧奉綴衣之禮釋皇齊之  
令典致聲化於雍熙內平外成實昭舊職增給班劍三十人物有  
其容徽章斯允位尊而禮卑居高而思降自夏徂秋以疾陳退朝  
延重違謙光之旨用申超世之尙改授司空領驃騎大將軍侍中  
錄尙書如故景命不永大漸彌留建元四年八月二十一日薨於  
私第春秋四十有八昔柳莊疾棘衛君當祭而輟禮晏嬰旣往齊

君趨車而行哭公之云亡聖朝震悼於上羣后恇慟於下豈惟哀  
經一國痛深一主而已哉追贈太宰侍中錄尚書如故給節羽葆  
鼓吹班劍爲六十人謚曰文簡禮也夫秉德而處萬物不能害其  
貞虛己以遊當世不能擾其度均貴賤於條風忘榮辱於彼我然  
後可兼善天下聊以卒歲經始圖終式免祇悔誰云克備公實有  
焉是以義結君子惠霑庶類言象所未形述詠所不盡故吏某甲  
等感逝川之無捨哀清暉之眇默餐輿誦於丘里瞻雅詠於京國  
思衛鼎之垂文想晉鍾之遺則方高山而仰止刊立石曰表德其  
辭曰

辰精感運昂靈發祥元首惟明股肱惟良天鑒璿曜踵武前王欽  
若元輔體微知章永言必孝因心則友仁洽兼濟愛深善誘觀海  
齊量登嶽均厚五臣茲六八元斯九內謨帷幄外曜台階遠無不  
肅邇無不懷如風之偃如樂之諧光我帝典緝彼民黎率禮蹈謙

諒實身幹跡屈朱軒志隆衡館眇眇立宗萋萋辭翰義既川流文亦霧散嵩構云頽梁陰載缺德猷靡嗣儀形長遞悵悵餘微鏘洋遺烈久而彌新用而不竭

文選類聚四十五

南郡王冠祝辭

皇帝使給事中太常武安侯蕭惠基加南郡王冠祝曰筮日戒賓

肇加元服棄尔幼志從厥成德親賢使能克隆景福

南齊書禮志上永明五年

南郡王昭業冠又見通典五十六

南郡王冠醺酒辭

旨酒既清嘉薦既盈兄弟具在淑慎儀形永屆眉壽於穆斯寧

南齊書禮志上通典五十六

南齊書禮志上通典五十六

賜進士出身二品銜廣東等處提刑按察使司按察使兼管驛傳事務高岡王毓藻校刊

全齊文卷十一終



全齊文卷十二

烏程嚴可均校輯

王奐

奐，僧虔從子，出繼從祖中書令球。字彥孫，仕宋爲著作佐郎、太子舍人。安陸王冠軍主簿，太子洗馬。本州別駕、中書郎、桂陽王司空諮議黃門郎。元徽初，爲晉熙王征虜長史、江夏內史，遷侍中、領步兵校尉，復出爲晉熙王鎮西長史，加冠軍將軍。江夏武昌太守，徵祠部尚書，轉掌吏部。昇明初，遷冠軍將軍、丹楊尹，出爲吳興太守，進號征虜將軍。齊受禪，進號左將軍，遷太常，仍轉侍中、祕書監，領驍騎將軍。又遷征虜將軍，臨川王鎮西長史。節南蠻校尉、南郡內史，進號前將軍。武帝卽位，徵右僕射，轉使持節、前將軍、湘州刺史。徙散騎常侍、江州刺史，遷右僕射。本州中正，遷尚書僕射，領軍將軍，轉左僕射，加給事中，出爲使持節、鎮

北將軍雍州刺史永明十一年坐擅殺監蠻長史劉興祖被收  
舉兵拒命尋伏誅

讓領南蠻校尉表

今天地初開萬物載新荆蠻來威巴濮不擾但使邊民樂業有司  
修務本府舊州日就殷阜臣昔遊西土較見盈虛兼日者戎墟之  
後夷毀難復雖復續以善政未及來蘇今復割撤大府制置偏校  
崇望不足以助強語實安能以相弊且資力既分職司增廣眾勞  
務倍文案滋煩非獨臣見其難竊以爲國計非允

南齊書  
王侯傳

王融

融字元長儉從子宋中書令僧達孫舉秀才爲晉安南中郎參  
軍歷晉陵王司徒法曹參軍遷祕書丞丹楊丞中書郎兼主客  
郎竟陵王子良以爲監朔將軍軍主遷林王卽位收下廷尉獄  
賜死年二十七有集十卷

擬風賦

奄今日采之既移忽今羣景之將馳靡輕筠之碧葉泛曾松之翠枝總高羽而蕭瑟韻珠露之參差此烈士之英風長寥亮其如斯

藝文類聚一  
初學記一

應竟陵王教桐樹賦

梧桐生矣于邱岫之曾隈儀龍門而插幹佇鳳羽以抽枝蹤楚宮而留稱藉潘館以翻聲直不繩而特秀圖匪規而天成同歲草以委暮共辰物而滋榮豈遠心於自外寧有志於孤貞

藝文類聚  
八十八

永明九年策秀才文

問秀才高第明經朕聞神靈文思之君聰明聖德之后體道而不居見善如不及是以崆峒有順風之請華封致乘雲之拜或揚旌求士或設簞待賢用能數化一時餘烈千古朕夙奉天命恭惟永圖審聽高居載懷祇懼雖言事必史而象闕未箴寤寐嘉猷延佇忠

金瓶梅詞話卷十二  
實子大夫選名升學利用賓王戀陳三道之要以光四科之首鹽梅之和屬有望焉

又聞昔周宣情千畝之禮號公納諫漢文缺三推之義賈生置言良以食爲民天農爲政本金湯非粟而不斗水旱有待而無憑朕式照前經寶茲稼穡祥正而青旂肅事土膏而朱紘戒典將使杏花萑葉耕穫不愆清剛冷風述遵無廢而釋耒佩牛相沿莫反兼貧檀富浸以爲俗若爰井開制懼驚擾愚民歸鹵可腴恐時無史白興廢之術矢陳厥謀

又問議獄緩死大易深規敬法卹刑虞書茂典自萌俗澆弛法令滋彰肺石少不寃之人棘林多夜哭之鬼朕所以明發動容異食興慮傷秋荼之密網惻夏日之殷威永念晝冠緇追刑厝徒以百鉞輕科反行季葉四支重罰爰創前古訪游禽於絕淵作霸秦基歌雞鳴於闕下稱仁漢牘二途如爽卽用兼通昌言所安朕將親

覽

又問聚人曰財次政曰貨泉流表其不匱貿遷通其有亡既龜貝積藏緡緡專用世代滋多銷漏參倍下貧無兼辰之業中產闕海歲之貲惟瘼卹隱無捨矜嘆上帝溥臨賜朕休實命卽斜之谷開而出銅且有後命事茲銘範充都內之金紹園府之職但亦側深巧學之患榆莢難輕重之權開塞所宜悉心以對

又問治厯明時紹遷革之運改憲救法審刑德之原分命顯於唐官文條炳於鄒說及岨夷廢職昧谷虧方漢秉素祇之徵魏稱黃星之驗紛爭空軫疑論無歸朕獲纂洪基思弘至道庶令日月休徵風雨玉燭克明之旨弗遠欽若之義復還於子大夫何如哉其驪翰改色寅丑殊建別白書之

文選

永明十一年策秀才文

問秀才朕秉錄御天握樞臨極五辰空撫九序未歌至於思政明

臺訪道宣室若墜之惻每勤如傷之念恆軫故卹貧緩賦省繇慎獄而多黍多稌不與兩穗之謠無褐無衣必盈七月之歎豈布政未優將罷民難業登爾於朝是屬宏議罔弗同心以匡厥辟

又問惟王建國惟典命官上叶星象下符川嶽必待天爵具修人紀成事然後沿才受職揆務分司是以五正置於朱宣下民不忒九工開於黃序庶績其凝周官三百漢位兼倍歷茲以降游惰實繁若閑冗畢弃則橫議無已冕笏不澄則坐談彌積何則可修善詳其對

又問昔者賢牧分陝良守共治下邑必樹其風一鄉可以爲績至有旦撫鳴琴日置醇酒文而無害嚴而不殘故能出人於阡危之域躋俗於仁壽之地是以賈誼有言天下之有惡吏之罪也頃深汰珪符妙簡銅墨而春雉未馴秋螟不散入在朕前湊其智略出連城守闕爾無間豈薪樞之道未弘爲網羅之目尙簡悉意正辭

無侵執事

又問朕聞上智利民不述於禮大賢彊國罔圖惟舊豈非療飢不期於鼎食拯溺無待於規行文儒是競弃本殉末厥弊滋多昔宋臣以禮樂爲殘賊漢主比文章於鄭衛豈欲非聖無法將以旣道而權今欲專士女於耕桑習鄉閭以弓騎五都復而事庠序四民富而歸文學其道奚若爾無面從

又問自晉氏不綱關河蕩析宋人失馭淮汴崩離朕思念舊民永言攸濟故選將開邊勞來安集加以納款通和布德修禮歌皇華而遣使賦膏雨而懷賓所以關洛動南望之懷徯夷遽北歸之念夫危葉畏風驚禽易落無待干戈聊用辭辯片言而求三輔一說而定五州斯路何階人誰或可進謀誦志以沃朕心

文選

拜祝書丞謝表

臣聞升曦戒晨陰牆不照其景層雲停夕幽草或漏其津至如明

兼就日澤深行雨。不有聖德。誰或其然。所以欽至道而出青皋。捨布衣而望朱闕。懷祿仕在代耕。期榮不謀入用。豈悟特擢之例。事均延祖。置佐之恩。任光元輔。踰溫情涯。普燭身表。畏翹車而必讓。誠濡翼之願。辭既聖主。謂其可施。故愚臣默思自勉。初學記十二

爲王儉讓國子祭酒表

竊以庠均義重。振古所崇。資師道尊。有來攸尙。匪曰蘭芷。疇變入室之情。不自朱藍。何遷素絲之質。藝文類聚四十六 御覽二百三十六

又表

況臣仁慚富侶。德謝潤身。識陋令經。器非匣重。何以昇墜道於殊身。反斯文於遙日。將使良璣修竹。無增瑩羽。敬遜務時。遂騫星歲。

藝文類聚

四十六

又表

臣聞修危方湛。弱露霜而取覆。懸衡紀正。輕塵委而必移。況臣才



非應俗用乖知治取其集木飲冰旌懸輪鴛方臣之念未足言矣

執文類聚

四十六  
上疏請給虜書

臣側聞僉議疑給虜書如臣愚情切有未喻夫虜人面獸心狼猛蜂毒暴悖天經虧違地義逋竄燭幽去來幽朔綿周漢而不悛歷晉宋其踰梗豈有愛敬仁智恭讓廉修慙犬馬之馴心同鷹虎之反目設橐稊有儲筋竿足用必有草竊關燧寇擾邊疆寧容款塞卑辭承衣請朔陛下務存遵養不時侮亡許其膜拜之誠納囊之費況復願同文軌儻見款遣思奉聲教方致猜拒將使舊邑遺逸未知所置衰胡餘噍或能自推一令蔓草難鋤涓流泛酌豈直疥癢輕疴容爲心腹重患抑孫武之言也因則數罰窘則多賞先暴而後畏其眾者虜之謂乎前中原土庶雖淪隔殊俗至於婚葬之晨猶巾禭爲禮而禁令苛刻動加誅轅于時獯粥初遷犬羊尙結

卽心徒怨，困懼成逃。自其將卒奔離，資待銷闕。北畏勅蠟，西逼南胡。民背如崩，勢絕防斷。於是曲從物情，僞竊章服。歷年將絕，隱蔽無聞。旣南向而泣者，日夜以覬。北顧而辭者，江淮相屬。凶謀歲暮，淺慮無方。於是稽顙郊門，問禮求樂。若來之以文德，賜之以副書。漢家軌儀，重臨畿輔。司隸傳節，復入關河。無待八百之師，不期十萬之眾。固其提漿伋俟，揮戈願倒。三秦大同，六漢一統。又虜前後奉使，不專漢人。必介以匈奴，備諸覘獲。且設官分職，彌見其情。抑退舊苗，扶任種戚。師保則后族，馮晉國。總錄則邦姓，直勒渴侯。台鼎則丘頽，苟仁端執政。則目凌鉗耳。至於東都羽儀，西京簪帶。崔孝伯程虞，則久在著作。李元和郭季祐，上于中書。李思冲飾虜清官，游助根泛居顯職。今經典遠被，詩史北流。馮李之徒，必欲遵尚。直勒等類，居致乖阻。何則？匈奴以酈騎爲帷牀，馳射爲機糧。冠方帽，則犯沙陵雪；服左衽，則風驟鳥逝。若衣以朱裳，戴之玄冕，節其

捐讓教以翔趙必同艱桎梏等懼冰淵婆娑踴躍困而不能前已  
及夫春草水生阻散馬之適秋風木落絕驅禽之歡息沸脣於桑  
墟別醢乳於冀俗聽韶雅如鸞鳴臨方丈若爰居馮李之徒固得  
恣矣崩之凶族其如病何於是風土之思深復戾之情動拂衣者  
連裾抽鋒者比鏃部落爭於下酋渠危於上我一舉而兼吞卞莊  
之勢必也且棘寶薦虞晉疆彌盛大鍾出智宿氏以亡帝略遠孚  
無思不服鑿光幸岱匪暮斯朝臣請收籍伊瀍茲書復掌猶取之  
內府藏之外籙於理有恆卽事何損若狂言足採請決敕施行齊書王融傳嘗遣使求書朝議欲不與融上疏

畫漢武北伐圖上疏

藝文類聚題作答敕撰漢武北伐圖賦

臣間情愔自中事符則感象構於始機動斯彰莊敬之道可宗會  
捐讓其彌肅勇烈之士足貴應輦鐸以增思肇植生民厥詳既賴  
降及興運維道有徵莫不有所因循而升皇業者也若夫膏腴既

稱太乙知五方之富。皮幣已列。帝劉測四海之尊。異封禪之文。則  
升中之典。攸罔嘆輿地之圖。乃席卷之庸。是立。伏惟陛下窮神盡  
聖。總極居中。偶化兩儀。均明二耀。拯玄綱於類絕。反至道於澆漓。  
可謂區寓儀刑。齊民先覺者也。臣亦遭逢。生此嘉運。鑒飲耕食。自  
幸唐年。而諷用昏靈。經術疏淺。將邁且輒。豈蔽與蔽。皇鑒燭幽。天  
高聽下。賞片言之或善。矜一物之失時。湔拂塵蒙。霑飾光價。拔足  
草廬。廁身朝序。復得拜賀歲時。瞻望日月。於臣心願。曾已畢矣。但  
千祀一逢。林明難再。思策鉛鴛。樂陳涓壚。竊習戰陣。攻守之術。農  
桑牧藝之書。申商韓墨之權。伊周孔孟之道。常願待詔朱闕。俯對  
青蒲。請開宴之私。談當世之務。位賤人微。徒深傾款。方今九服清  
怡。三靈和晏。木有附枝。輪無異轍。東縱獻舞。南辯傳歌。羌契踰山。  
秦屠越海。舌象翫委體之勤。輜譯厭瞻巡之數。固將開桂林於鳳  
山。創金城於西守。而蠢爾獯狄。敢讎大邦。假息關河。竊命函谷。淪

故京之爽塏變舊邑而荒涼息反玷之儒衣久伊川之被髮北地  
殘氓東都遺老莫不茹泣吞悲傾耳戴目慙心仁政延首王風若  
試馳咫尺之書具甄戎旅之卒徇其墮城納其降虜可弗勞弦鏃  
無待干戈眞皇王之兵征而不戰者也臣乞以執殳先邁式道中  
原澄瀚渚

藝文類聚作海

之恆流掃狼山之積霧係單于之頸屈左賢之

膝習呼韓之舊儀拜鑾輿之巡幸然後天移雲動勒

藝文類聚作升封岱

宗咸五登三追蹤七十百神肅警萬國具僚璿弁星離玉帛雲聚

集三燭於蘭席聆萬歲之禎聲豈不盛哉豈不遒哉昔桓公志在

伐莒郭牙審其幽趣魏后心存去漢德祖究其深言臣愚昧忤誠

不足以知微然伏揆聖心規模弘遠旣圖載其事必克就其功臣

不勝歡喜

南齊書王融傳永明末世祖欲北伐使毛惠秀畫漢武北伐圖使融掌其事融好功名因此上疏藝文類聚五

九十

上疏乞自効

藝文類聚題作勸高帝北伐敗乃武帝之誤

王融

臣每覽史傳見憂國忘家捐生報德者未嘗不撫卷歎息以爲古  
今共情也然或以片言微感一滄小惠參國士之阿同布素之遊  
耳豈有如臣獨拔無間之伍過超非分之位名器雙假榮祿兩升  
而宴安旻罷之晨優游旰食之日所以敢布丹愚仰聞宸聽今議  
者或以西夏爲念臣竊謂之不爾其故何哉陛下聖明羣臣悉力  
順以制逆上而御下指開賞黜之言微示生死之路方域之人皆  
相爲敵旣兵威遠臨人不自保雖窮鳥必啄固等命於梁欽文類  
聚作良  
鵠困獸斯驚終並懸於厨鹿凱師勞飲固不待晨臣之寸心獨有  
微願自獫狁荐食荒侮伊瀍天道禍淫危亡日至母后內難兵力  
外虛謠言物情屬當今會若藉巫漢之歸師騁士卒之餘憤取函  
谷欽文類  
聚作河如反掌陵關塞若摧枯但士非素蓄無以卽用不教民  
戰是寶棄之特希私集部曲豫加習教若蒙垂許乞隸監省拘食  
人身權備石頭防衛之數臣少重名節早習軍旅若試而無績伏

受面欺之誅用且有功仰酬知人之哲南齊書王融傳朝廷討雍州刺史王與融復上疏

文類聚

五十九

求自試啟

臣聞春秋蟬集候相悲露木風榮藝文類聚作藝臨年共悅夫唯動植

且或有心況在生靈而能無感臣自奉望宮闕沐浴恩私拔迹庸

虛參名盛列綴劔紫複趨步丹墀歲時歸來誇榮邑里然無勤而

官昔賢曾議不任而祿有識必幾臣所用慷慨憤懣不遑自安誠

以深恩鮮報聖主難逢蒲柳先秋光陰不待貪及明時展悉愚效

以酬陛下不世之仁若微誠獲信短才見序文武吏法惟所施用

夫君道含弘臣術無隱翁歸乃居中自見充國曰莫若老臣竊景

前修敢蹈輕節藝文類聚作雖冒不媒之鄙式罄奉公之誠抑又唐堯

在上不參二八管夷吾恥之臣亦恥之願陛下裁覽南齊書王融傳

藝文類聚

謝武陵王賜弓啟

殿下摘藻蕙樓，暢藝蘭苑，敷積

藝文類聚作達

玉於風筵，疊連珠於月韻。

御覽作

兎園掩秀，鄴水慙奇，融指讓未工，濫升下

御覽作

飲之賞，操

孤反正。

藝文類聚作矢

謬奉招賢之錫，文韜鏤景，逸幹梢雲，玩溢百齡，佩

流千載。

藝文類聚六十初學記二十一十二御覽三百四十七

謝敕賜御裘等啟

雲衣降授，仙裾曲委，榮振素里，澤駭蓬心，昔漢帝解裘，不獨前寵。

曹王褫帶，復降今恩。

藝文類聚六十七

謝竟陵王賜納裘啟

降飾自尊，垂榮及賤，玄玉不純，曾波奪采，南陸方永，北風日壯，無

衣無褐，發念聖衷，而挾纊之間，每流解裘之賜，偏委

藝文類聚六十七

謝竟陵王示扇啟

竊以六翮風流，五明氣重，若此圓綃，有兼玩寶，輕踰雪羽，絜並霜



文子淑官其如規班姬儷之明月豈直魏王九華漢臣百綺汎復  
動製聖衷垂言炯式載募聽脉戒範樞機藝文類聚六十九

謝司徒賜紫鮮啟

東越水羞寶罄乘時之美南荆任土方指鮮魚之最藝文類聚七十二

謝敕賜米啟

臣無王陽之術計然之智不能負粟百里分地一廛上虧溫養自  
取飢切豈悟外恩橫集天私妄委藝文類聚七十二

謝安陸王賜銀鉢啟

素金之貴有訪仙經鐫刻可奇見符神鼎撤膳器於珍羞之席降  
寶玩於簞瓢之門藝文類聚七十三

謝竟陵王示法制啟

翔慧燭於昏塗灑法水於塵路至夫澄心洗累之規莊情束影之  
制解網出界之訓滅惑淨照之旨固以行首霜威字端風厲信可

以糟滓五書、據批百氏、升簾聃周、筭竿尼旦、所謂窺七澤而狹潢  
汗、登太山而小天下、藝文類聚  
七十七

法門頌啟

依以迦文啟聖、道冠百靈、常住置言、理高萬乘、神儀挺發、非望雲  
就日所追、睿識獨尊、豈生明弱、言能企、鹿苑金輪、弘汲引以濟俗、  
鶴林雙樹、顯究竟以開氓、惜乎祇園滅影、驚岳淪光、微辭既遙、大  
義如綴、自不宣遊十地、擁接九區、豈有導覺水之塞源、極法雲於  
落仞、明分覽四諦之必空、悟三業之暫有、應務屈己、則仁兼旦爽、  
隨方申道、則慧一淨名、驅率土於福林、入蒼黔於正術、藝文類聚  
七十七  
爲竟陵王與隱士劉蚪書

玉燭登年、金商在律、炎涼始貿、動靜惟安、勤味道腴、幸遵雅尚、豈  
不樂哉、僕誠幸甚、百姓一心、眾生不疾、比屋可封、將又何求、但自  
書獨擁、善談無机、願言之子、實悔我心、所以不遠千里、尺書道意、

自清清既辨、澆漓代襲、隱顯之術參差、默語之途紛互、或飾智以  
警愚、或激情以悟俗、或破己以開通、或謬歌以明道、屠羊駟馬、未  
足磷其堅、佯狂如愚、豈能緇其白、官楚蕃魏、人外之氣逾邇、入漢  
遊梁、區中之韻彌少、及推其輕重、品其得失、則淵懷洞賞、寧或符  
之、僕夙養閒襟、長慕出概、迹塵珪組、心逸江湖、未面自親、聞風如  
舊、而迴駕之念徒軫、式閔之禮無階、固已伫軸深衷、傾筐遐路者  
矣、君矯然獨遠、確乎難拔、素志與白雲同悠、高情與青松共爽、宣  
習質文、緇林枯而重茂、昭辨空有、連河壅而復滔、所謂忘言之人  
可論、天人之際、豈能鳳舉鶴雛、有心儀羣、高踰愛海、比策禪衢、沾  
濠射之冥游、屈祗鷺之法侶、闡三乘於窮子、發二諦於困蒙、有是  
因也、何其暢歟、今皇風具穆、至道弘被、四海不溢、五嶽無塵、膠序  
肇修、經法敷廣、人賤璣璫、家習禮讓、樵蘇必時、郊林全鬱、罽網有  
節、鱗羽偕翔、至於層山絕澗、還帶幾畎、膏田沃野、互望廡蹕、信可

以招往隱淪樓集勝寄故文舉築室治城之阿次宗植援西山之趾葛洪考槃於海岫釋遠肥遁於鍾幽每踐其遺蹤輒深九原之歎若高步可遷復何懷乎四子昔宣尼之見伯雪師利之往維摩豈不知相忘之道哉諒有以也未敘之間爲道自愛一二令波瑤之口具

廣弘明集十九末云王元長之詞也

下獄答辭

因實頑蔽觸行多讐但夙忝門素得奉教君子爰自總髮迄將立年州閭鄉黨見以計愚慎朝廷衣冠謂無聲咎過蒙大行皇帝獎育之恩又荷文皇帝識擢之重司徒公賜頂士林安陸王曲垂眄接既身被國慈必欲以死自効前後陳伐虜之計亦仰簡先朝今段犬羊乍擾紀僧真奉宣先敕賜語北邊動靜令因草撰符詔于時卽因啟聞希侍鑒輿及司徒宣敕招募同例非一實以戎事不小不敢承教續蒙軍號賜使招集銜敕而行非敢虛扇且格取亡叛

不限倫楚、狡弄聲勢、應有形迹、專行權利、又無贓吮、反覆脣齒之間、未審悉與誰言、傾動煩舌之內、不容都無彼此、但聖主膺教、實所沐浴、自上甘露頌、及銀甕啟、三日詩序、接處使語辭、竭思稱揚、得非誹謗、且王公百司、唯賢是與、高下之敬、等秩有差、不敢踰濫、豈應訛毀、囚才分本劣、謬被策用、悚作之情、夙宵兢惕、未嘗誇示里閭、彰曜遠邇、自循自省、並愧流言、良由緣淺寡處、致貽謗、伏惟明皇臨宇、普天蒙澤、戊寅赦恩、輕重必宥、百日曠期、始蒙旬日、一介罪身、獨嬰憲劾、若事實有徵、爰對有在、九死之日、無恨泉壤

南齊書  
王融傳

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷十二終

全齊文卷十三

烏程嚴可均校輯

王融

三月三日曲水詩序

臣聞出豫爲象，鈞天之樂張焉。時乘既位，御氣之駕翔焉。是以得一奉宸，逍遙襄城之域。體元則大，愜望姑射之阿。然省眇寂寥，其獨適者已。至如夏后兩龍，載驅璿臺之上。穆滿八駿，如舞瑤水之陰。亦有饗云，固不與萬民共也。我大齊之握機創厯，誕命建家。接禮貳宮，考庸太室。幽明獻期，雷風通響。昭華之珍既徙，延喜之玉攸歸。革宋受天，保生萬國。度邑靜鹿丘之歎，遷鼎息大坰之慙。紹清和於帝猷，聯顯懿於王表。敷發開其遠祥，定爾固其洪業。皇帝體膺上聖，運鍾下武。冠五行之秀氣，邁三代之英風。昭章雲漢，曜麗日月。牢籠天地，彈壓山川。設神理以景俗，敷文化以柔遠。澤普

汎而無私。法含弘而不殺。猶且具明廢寢。吳晷忘餐。念負重於春  
冰。懷御奔於秋駕。可謂巍巍弗與。蕩蕩誰名。秉靈圖而非泰。涉孟  
門其何嶮。儲后睿哲在躬。妙善居質。內積和順。外發英華。斧藻至  
德。琢磨令範。言炳丹青。道潤金璧。出龍樓而問豎。入虎闕而幽  
眚。敬盡於一人。光耀究於四海。若夫族茂麟趾。宗固磐石。跨掩昌  
姬。韜軼炎漢。元宰比肩於尚父。中鉉繼踵乎周南。分陝流勿翦之  
權。來仕允克施之譽。莫不如珪如璋。令聞令望。朱弟斯皇。室家君  
王者也。本枝之盛如此。稽古之政如彼。用能免羣生於湯火。納百  
姓於休和。草萊業業。守屏稱事。引鏡皆明目。臨池無洗耳。沈冥之  
怨。旣缺邁軸之疾。已消。興廉舉孝。歲時於外府。署行議年。日夕于  
中甸。協律總章之司。厚倫正俗。崇文成均之職。導德齊禮。挈壺宣  
夜。辯氣朔於靈臺。書芻珥形。紀言事於仙室。褰帷斷裝。危冠空履  
之史。影搖武猛。扛鼎揭旗之士。勤恤民隱。糾迤王慝。射集隼於高



嘯繳大風於長隧。不仁者遠。惟道斯行。讓芳蔑聞。攘爭掩息。稀鳴  
杵於砥路。鞠茂草於圓扉。耆年闕市井之游。稚齒豐車馬之好。宮  
鄰昭泰。荒憊清夷。侮食來王。左言入侍。離身反踵之君。鑿首貫曾  
之長。屈膝厥角。請受纓縻。文鉞碧帟之琛。奇幹善芳之賦。紈牛露  
夫之玩。乘黃茲白之驅。盈衍儲邸。充仞郊虞。區牘相諄。鞿譯無臆。  
一尉候於西東。合車書於南北。暢轂埋轡。麟之轍。綏旂卷悠。悠之  
旆。四方無拂。五戎不距。偃革辭軒。銷金罷刃。天瑞降。地符升。澤馬  
來。器車出。紫脫華。朱英秀。佞枝植。麻草孽。雲潤星暉。風揚月至。江  
海呈象。龜龍載文。方握河沈璧。封山紀石。邁三五而不追。踐八九  
之遙迹。功既成矣。世既貞矣。信可以優游暇豫。作樂崇德者歟。于  
時青鳥司開。條風發歲。粵上斯已。惟暮之春。同律克和。樹草自樂。  
禋飲之日在茲。風舞之情咸蕩。去蕭表乎時訓。行慶動於天矚。載  
懷平圃。乃睠芳林。芳林園者。福地奧區之湊。丹陵若水之舊。殷殷

均乎姚澤、應應尙於周原、狹豐邑之未宏、陋譙居之猶褊、求中和而經處、揆景緯以裁基、飛觀神行、虛檐雲構、離房乍設、層樓間起、負朝陽而抗殿、跨靈沼而浮榮、鏡文虹於綺疏、浸蘭泉於玉砌、幽幽叢薄、秩秩斯干、曲梯迢迢、潺湲徑復、新萍泛沚、華桐發岫、雜天采於柔荑、亂嚶聲於縣羽、禁軒承幸、清宮俟宴、緹帷宿置、帶幕宵懸、旣而滅宿澄霞、登光辨色、式道執殳、展輪効駕、徐鑾警節、明鍾暢音、七萃連鑣、九旂齊軌、建旗拂霓、揚鼓振木、魚甲煙聚、貝冑星羅、重英曲瑤之飾、絕景遺風之騎、昭灼甄部、駟駿函列、虎視龍起、雷駭電逝、轟轟隱隱、紛紛軫軫、羌難得而稱計、爾乃迴輿駐罕、嶽鎮淵淳、睟容有穆、賓儀式序、授几肆筵、因流波而成次、薰肴芳醴、任激水而推移、葆佾陳階、金匏在席、賦奏翹舞、籥動邪詩、召鳴鳥于弇州、藝文類聚作山追伶倫於嶰谷、發參差於王子、傳妙靡於帝江、正歌有闕、羽觴無算、上陳景福之賜、下獻南山之壽、信凱謠之在藻、

知和樂於食苹桑榆之陰不居草露之滋方渥有詔曰今日嘉會  
咸可賦詩凡四十有五人其辭云爾

文選 茲  
文類聚四

淨住子頌

皇覺辨德篇頌

紫實昧朱狂斯濫哲舛運揚鑣分源競柅麗景或幽澄舒每缺水  
激波生湮深火滅情端徒總埋向空徹不有明心誰驅聖轍

開物歸信篇頌

茲文類聚七十  
六作歸信門頌

生浮命舛識罔情遠業雲結影慧日潛暉遙迤修道極夜無歸登  
山小魯泛海難沂參珉見璧辨礫知璣迷其未遠匪正何依

滌除三業篇頌

茲文類聚作懺  
悔三業門頌

樂由生滅思以身全業資意造事假言筌利名相倚榮辱茲纏其  
賊匪躡周錯徒鑣惑端風緒愛境旌懸不勤一至何階四禪

脩理六根篇頌

傾都麗佳、繞梁之曲、肥馬輕裘、蕙肴芳醪、晦黑滋生、昏瞶競欲貌  
蕩魂浮、身甘意觸、靈龜攝根、睛焚衛足、蟲草或虞、人如不勗、  
生老病死篇頌

穠華易遷、繁蕪不實、星髮鮐肌、鄰光惕日、二豎潛言、十巫空術、生  
之往矣、高松蕭瑟、卽化翻靈、從緣墜質、噬臍有譏、嗟然何汨、  
尅責身心篇頌

瞻彼進德、莫敢或遑、顧咨小智、徒以大康、豈無通術、跋此榛荒、雖  
有重離、迹照螢光、循情內負、撫事外傷、層羅一舉、空念高翔、  
檢覆三業篇頌

渾風緬沒、旅俗膠加、競文內疾、誰覩心瑕、再惟情反、三省身華、肯  
危窮濫、貧隔豪奢、遭迴六蔽、紛綸七邪、不圖厥始、逸馬難豎、

訶詰四大篇頌

迅矣百齡、綿茲六八、出沒昏疑、興居愛習、矻矻子求、營營爾給、匪

德日歸惟殃斯集貪人敗類無厭自及昭回不希玄墟何泣

出家順善篇頌

苑文類聚作  
出家善門頌

澡身浴德晦迹埋名將安寶地誰畱化城道場曠謫禪逕開海風  
飄弗響震輒徒驚嘯傲焉慮脫落何營長捐有結永置無生  
在家從惡篇頌

石磨則磷王生雖堅維居必徙豈曰能賢冰開春日蘭敗秋年教  
隨類反習乃情遷命符三漏生偕十纒茲焉遂往憂畏方延

沈冥地獄篇頌

冥津殊復曉高聽亦能卑陰牆雖兩密幽夜有四知炎山翻烈火  
冰澗市寒漸羅城振雲幕鋒樹鬱霜枝茹荼非云苦集木豈稱危  
求仁曾已得長歎欲何爲

出家懷道篇頌

鹽石諒非眞飾瓶信爲假竊服皋門上濫吹潘軒下鳳祀徒驚心

騶交終好野實相豈或照浮榮未能捨迹殊冠冕客事襲驅馳者  
已矣歇鄭聲無然亂周雅

在家懷善篇頌

魏文類聚作  
在家善門頌

處塵貴不染被褐重懷珠美玉曜幽石曾蘭挺叢叢四氏不爲侶  
三界豈能渝諒茲親愛染寧以財利拘煩流捨智寶榛路坦夷途  
萬物竟何匹烈火樹紅趺

三界內苦篇頌

心怨動紛遶情怡輒遷互歡愛一離遠傷憂坐衰暮連幌結清陰  
高臺起風露腐毒緣芳旨天伐實修嫫慾網必虧生繁罫或全免  
眇眇夜何期悠悠終肯悟

出三界外樂篇頌

端襟測煩海矯步寫埃氛三受猶絕雨八苦若浮雲輸心仰圓極  
罄質委方墳朝遊淨國侶暮集靈山羣燈祇開遠照香字薦嘉薰

俛首睇人俗，信矣靜爲君。

斷絕疑惑篇頌

生塗非一理，識緒固饒津。徒駭東陵富，空嗟北郭貧。國生曾已戾，  
顏氏信爲仁。逢尤昭往業，習善會茲身。勤憂永夷泰，晏安終苦辛。  
合名且云重，豈若樹良因。

十種慚愧篇頌

神膏施惟重，玄酒恩未隆。明璣隋水上，潤玉藍田中。稟天性所極，  
資敬道攸崇。羽毛共以勢，輪軌相爲通。報德愴前雅，酬言愛餘風。  
遵途每多舛，願省能無忤。

極大慚愧篇頌

冬狐理豐龜，春蠶緒輕絲。形骸剖爲阻，心識還自欺。華容羈昨日，  
生平少年時。驅車追俠客，酌酒弄妖姬。但念目前好，安知身後悲。  
惕然一以愧，永與情愛辭。

善友獎勵篇頌

蘭室改蓬心。梅崖變伊草。丹青有必渝。絲磬豈常結。曲轅且繩直。詭木遂雕藻。一簣或成山。百里倦中道。隆漢乃王臣。失楚信元保。勉矣德不孤。至言匪虛造。

戒法攝心篇頌

金山嚴寶仞。瓊魄烈瑤蕤。牆狐議不窟。檐鸛豈能棲。淨花莊思序。慧沼盥身倪。六羣倘未一。七眾固恆齊。端儀有直景。正道無傾蹊。惟宮超以悟。襄野竟何迷。

自慶畢故止新篇頌

春非我春秋非秋。一經長夜每悠悠。陶形練氣住元造。啟蒙夷阻出重幽。榮公三樂非爲曠。箕生五福豈能求。靈姿妙境往難集。微言至道此去修。年逢生幸曾以慶。盈愆貳過倘知憂。畢故斷新別苦海。希賢庶善憑智流。



大忍惡對篇頌

春山之下玉抵禽。漢水之陽璧千金。清業神居德非重。潔己愚侶道已深。愛憎喜怒生而自。榮華芳旨世所欽。鴻才巨力萬夫敵。誰有制此方寸心。逸驥狂兕曠不御。繁羈密相僅能禁。遣情遺事復何想。寂然無待恣幽尋。

緣境無礙篇頌

悅象惚物終不名。龍舉鸞集竟誰辯。絕智亡身孰爲礙。蹈名戢曜故能顯。匪日匪月灼以懸。安飛安翔虛而踐。璧石無間恣出沒。水火有性任舒卷。敷教應俗驚泉流。現迹依方迅風轉。大哉超世莫與羣。希轅慕舜宜自勉。

一志努力篇頌

像北二山尙有移。河中一洲亦可爲。精誠必至霜塵下。意氣所感金石離。有子刺掌修名立。王生擢髮美譽垂。自來勤心少竊墜。何

不努力出憂危勝幡法鼓繁且擊智師道眾紛以馳有常無我儼  
既列無明有縛孰能窺

禮舍利寶塔篇頌

越人鑄金誠有思魏后椎木亦云悲中賢小節猶可戀去聖咽遠  
情彌滋祇樹蕭條多宿楚王宮寂寞眇遺基設像居室若有望間  
儀駐景暖如之連卿共日獨先後道悠命舛將無時傾懷結想惻  
以慕乖靈寫照拂塵疑

敬重正法篇頌

藝文類聚  
作法門頌

出不自戶將何由行不以法欲焉修之燕入楚待駁足凌河越海  
寄輕舟仁言爲利壯已博聖道弘濟邈難求通明洞燭煥曾景深  
凝廣潤湛淵流翼善開賢敷教義照蒙啟惑滌煩憂功成弗有名  
弗居淡然無執與化遊

奉養僧田篇頌

五玉已潤談而信八桂雖芳風乃掃妙理至言唯聖寶不自伊人  
孰弘道照空觀法識遷流撫俗瞻光厭生老絕滅情嗜斷懼怡縱  
落豪華棄雕藻親愛倏忽信風煙財利悠悠若塵草測以龍雲豈  
曰高濯足江漢更慚皓

勸請增進篇頌

俟河之清逢聖朝靈智俯接一其遙白日馳光不流照葵藿微志  
徒傾翹遍盈空有盡三界綿塞宇宙罄八遼德光業遠升至覺寂  
冥常住獨能超煎灼欲火思雲露沈汨使水望舟橋弘慈廣度昔  
有誓法輪道御且徐驥

隨喜萬善篇頌

聞善若已燭良書見賢思齊美通語感幽動地孝有誠殞首流腸  
忠爲操振禮摘文弘憲則機謀魔勇靜姦暴明白人素志沖聞高  
論窮微契神奧捐軀濟物不邀名輕財貴義豈期報百行萬善紛

塗軌求誠罄想畢歡臨

迴向佛道篇頌

悠悠九土各異形擾擾四俗非一情驅車秣馬徇世業市交鬻義  
銜虛名三墨紛紜殊不會七儒委鬱曾未并吉凶拘忌迺數術取  
與離合實縱橫朝日夕月竟何取投巖赴火空捐生咄嗟失道爾  
迴駕河彼流水趣東瀛

發願莊嚴篇頌

心所期兮彼之岸何事浮俗久淹追照慧日兮駕法雲騰危城兮  
出塵館芳殊燁兮聞歲時寶樹颺兮警昏旦清露溥甘永以挹喜  
國流采常爲玩無待殷鼎方丈羞安用秦箏纖指彈勒誠款願長  
不渝習苦塵勞從此捍

皇太子哀策文

繡幕敗塗銅池從殯保鐸旣行校緯且引皇帝痛染盛之闕奉哀

七豈之有亡。聞含嗟乎。崇正顧掩。歛於承光。式瞻元良。永懷人寶。  
俾茲史策。載餘風道。其辭曰。

居辰北極。在日重離。誕惟妙善。克自生知。資神爲契。合聖如規。地  
維缺位。月紀寒期。哀纏晦朔。燧改歲時。檀粥不溢。薑桂無滋。俛終  
心禮。昌我帝基。思皇下武。緝戎上德。將叶人神。永貽家國。用稽嗣  
典。實弘儲則。庸器宣華。訪安永福。上漏驂軒。初晨戒服。慶色伊滿。黃  
儀載肅。至誠莫感。遐福空辭。氛程月志。履動年司。素娥犯列。青雲  
失滋。中楹軫夢。當戶陳詩。楚藥毀方。秦鑿反轍。高議虛演。奇文徒  
說。遠賓上靈。長違昭世。痛結宸慈。哀震華棣。嗚呼哀哉。軒帷高寂。  
庭帳深陰。鶴闔晝掩。鳧燈夜沈。仍襲未改。容饌如臨。暖徽儀而可  
慕。標嗣子之純心。嗚呼哀哉。韋弁告期。麻衣請日。辯域展圖。揚龜  
獻吉。文物充階。具僚在位。總葭挽之哀淒。視風煙之騷瑟。嗚呼哀

歲飾麾輅而南指，轉旌羽而北徂。車結軫於雕轂，馬緩節於金蘇。寄靈心於萬象，增戀戀於國都。嗚呼哀哉，光徒靡而欲沈。山荒涼而遂晚，城闕絕而何期。平原忽而超遠，情有望而弗追。顧如疑於將反，嗚呼哀哉。

藝文類聚十六

永嘉長公主墓志銘

作儀阿媛，取儷漢妃。相金漏質，標李愔暉。肅穆婦容，靜恭女德。願史求箴，披圖問則。慶善郁夷，與仁冥默。宵燧亡明，曉挽已聲。松門嚴闕，泉帳寒清。悠哉白日，鬱彼佳城。

藝文類聚十六

豫章文獻王墓誌銘

領袖傾淪，人綱弛沒。半嶽摧峯，中河墜月。眷然曉隧，如何夜臺。儼駢懷慕，葆吹徘徊。千秋萬祀，顧有餘哀。

藝文類聚四十五

王秀之

秀之，字伯奮，琅邪臨沂人。宋儀同敬弘孫，歷著作佐郎、太子舍

人轉洗馬司徒左西屬出爲晉平太守還除安成王驃騎諮議  
轉中郎又爲高帝驃騎諮議昇明末轉左軍豫章王誕長史尋  
陽太守隨府轉鎮西長史南郡太守齊受禪遷司馬加監朔將  
軍遷長史領儒林祭酒遷南郡王司馬復爲黃門郎領羽林監  
遷長沙王中軍長史武帝卽位爲太子中庶子吏部郎出爲義  
興太守遷侍中祭酒轉都官尚書進侍中領射聲校尉出爲輔  
國將軍隨王鎮西長史南郡內史徵侍中領遊擊將軍未拜仍  
爲輔國將軍吳興太守隆昌元年卒謚曰簡子

貼宗測書

昔人有測畫僞札輕以自方耳

南史宗測傳

與朝士書

此郡承虞公之後善政猶存道風易遵差得無事

南齊書虞愿傳南史虞愿傳

遺令

木服不得入棺祭則酒脯而已世人以僕妾直靈助哭當由喪主不能消至欲以多聲相亂魂而有靈吾當笑之

南史二十九

王晏

晏字士彥琅邪臨沂人宋通直常侍弘之孫大明末爲臨賀王國常侍員外郎巴陵王征北參軍安成王撫軍參軍隨府轉車騎參軍晉熙王安西主簿武帝鎮西記室諮議累遷領軍司馬中軍從事中郎齊受禪轉太子中庶子武帝卽位轉長兼侍中領步兵校尉遷侍中累至右僕射領太孫右衛率鬱林卽位轉左僕射海陵卽位轉尚書令加後將軍封曲江縣侯明帝卽位進驃騎大將軍領太子太傅進爵爲公建武四年坐罪誅

奏爲文惠太子服

案喪服經爲君之父長子同齊衰葬今至尊旣不行三年之典止服葬制羣臣應降一等便應大功九月功衰是兄弟之服不可以



服尊臣等參議謂宜重其衰裳減其月數同服齊衰三月至於太  
孫三年既申南郡國臣宜備齊衰朞服臨汝曲江既非正嫡不得  
禰先儲二公國臣並不得服

南齊書禮志下永明十一年文惠太子薨右僕射王晏等奏又見通典八

又奏

案喪服經雖有妾爲君之長子從君而服二漢以來此禮久廢請  
因循前準不復追行

南齊書禮志下通典八十二

又奏

伏尋御服文惠太子墓內不奏樂諸王雖本服朞而儲皇正體宗  
廟服者一同釋服奏樂姻娶便應並通竊謂二事俱是嘉禮輕重  
有異娶婦思嗣事非全吉三日不樂禮有明文宋代墓喪降在大  
功者婚禮廢樂以伸私戚以從前典

南齊書禮志下通典八十二

又奏

案禮祥除皆先於今夕易服明旦乃設祭尋比世服臨然後改服與禮爲乖今東宮公除日若依例皇太孫服臨方易服臣等參議謂先哭臨竟而後祭之應公除者皆於府第變服而後入臨行奉慰之禮南齊書禮志下通典八十二

奏太子祔太廟禮

故太子祔太廟既無先準檢宋元后故事太尉行禮太子拜伏與太尉俱臣等參議依擬前典太常主廟位太尉執禮祔太孫拜伏皆與之俱正禮既畢陰室之祭太孫宜親自進奠南齊書禮志上永明十一年右侯射王晏吏部尚書徐孝嗣侍中何胤奏詔可

明堂配饗議

若用鄭玄祖宗通稱則生有功德沒垂尊稱歷代配帝何止於郊今殷薦上帝元屬武帝齊書作元屬世祖百代不毀其文廟乎南齊書禮志上隆昌元年左侯射王晏議又見通典四十四

江敦不應轉都官尚書啟

江敦今重登禮閣兼掌六軍慈渥所覃實有優忝但語其事任殆同閑輩天旨既欲升其名位愚謂以侍中領驍騎望實清顯有殊納言南齊書江吳傳永明七年徙爲侍中領驍騎將軍尋轉郎官尚書領驍騎將軍王晏啟西昌侯不應領選啟

鸞清幹有餘然不諳百氏恐不可居此職南史二

十四

王思遠

思遠晏從弟小字阿戎宋建平王景素辟爲南徐州主簿除晉熙王撫軍行參軍安成王車騎參軍建元初爲長沙後軍王簿尚書殿中郎出補竟陵王征北記室參軍隨府遷司徒錄事參軍太子中舍人建安內史除中書郎大司馬諮議吳郡丞還爲司徒諮議參軍領錄事轉黃門郎遷御史中丞建武中遷吏部郎改授司徒左長史永元二年遷度支尚書未拜卒贈太常諡

貞子

讓吏部郎表

近頻煩歸啟實有微概陛下矜遇之厚古今罕儔臣若孤恩誰當戮力既自誓輕軀命不復以塵黜爲疑正以臣與晏地惟密親必不宜俱居顯要悽悽丹赤守之以死臣實庸鄙無足獎進陛下甄拔之旨要是許其一節臣果不能以理自固有罪則哲之明犯冒之尤誅責在己謬賞之私惟塵聖鑒權其輕重寧守彌心且亦緣陛下以德御下故臣可得以禮進退伏願恩垂極宥不使實墜今若祇膺所忝三公不足爲泰犯忤之後九泉未足爲劇而臣苟求刑戮自棄富榮愚夫不爲臣亦庶免此心此志可憐可矜如其上命必行請罪非理聖恩方置之通塗而臣固求擠壓自慙自悼不覺涕流謹圖欽鉞悉心以請窮則呼天仰祈一照

南齊書王恩遠傳

賜進士出身二品銜廣東等處提刑按察使司按察使兼管驛傳事務黃岡王毓漢校刊

全齊文卷十三終